

四庫全書

史部

欽定四庫全書

史部

欽定續通志卷三百十九

中書_臣李采覆勘

總校官原任侍講_臣王燕緒

欽定四庫全書

欽定續通志卷三百十六

列傳

宋二十

劉保勲

劉蟠

宋瑞

樊知古

郭載

臧丙

張觀

陳從信

張平

王繼升

昭遠

尹憲

王賓

安忠

劉保勲字脩業河南人父處讓仕後唐入晉拜樞密使出為彰德軍節度保勲少好騎射後唐清泰中裁十許歲攝潞州左司馬隨父署彰德軍衙內都校父卒補供奉官習刑名之學頗工詩因獻詩宰相桑維翰奇之奏擢太常丞歷漢為祕書丞周廣順初有薦其詳練法律兼大理正遷工部員外郎歷掌鄆宋楚三州鹽麴商稅太祖即位拜戶部員外郎為雲安監鹽制置使歲滿出羨餘百萬轉運使欲以功狀聞保勲曰貪官物為己功

可乎乃止太平興國四年征晉陽改戶部郎中為隨軍
轉運使兼勾當北面轉運事又與侯陟同勾當軍前諸
事會陝西北路轉運使雷德驤調沁州軍糧後期詔劾
德驤以保勲代之太原平命知并州累拜右諫議大夫
知開封府雍熙三年命曹彬等征幽州保勲以本官知
幽州行府事子利涉以開封府兵曹督易粟隨軍常從
其父會主師不利濟拒馬河更相蹂躪多死保勲馬陷
淖中利涉自後掀出之力不勝人馬相擠壓遂俱死時

年六十二帝命恤其後保勲三子二子先保勲死季子
隨沒以其孫巨川為嗣授祕書正字端拱初特詔贈工
部侍郎保勲性純謹未嘗忤物精於吏事不憚繁劇嘗
語人曰吾受君命未嘗辭避接同僚未嘗失意居家積
貲未嘗至千錢及死聞者皆痛惜之至道三年又錄其
次孫世長為正字咸平初保勲妻卒詔賜錢十萬巨川
累為比部郎中

按宋史此下有滕中正
傳無事蹟足錄今從刪

劉蟠字士龍濱州渤海人漢乾祐二年舉進士解褐益

都主簿太祖即位歷安遠軍及河陽節度推官乾德五年召拜監察御史典染院事開寶七年與殿中丞劉德言同知淮南諸州轉運事太平興國初就遷倉部員外郎改轉運使歲漕江東米四百萬斛以給京師頗為稱職改駕部員外郎八年丁內艱時以諸州綱運留滯起復知京城陸路發運司事會河決韓村大發丁夫塞之命蟠調給其餉未幾河塞累遷左諫議大夫淳化二年卒年七十三蟠性清介寡合能攻苦食淡專事苛刻好

設竒詐以售知人主典染作日太祖多臨視之蟠偵車
駕至輒衣短後衣芒屨持梃督役頭蓬不治遽出迎謁
太祖以為勤事賜錢二十萬嘗受詔巡茶淮南部民私
販衆蟠乘羸馬偽稱商人抵民家求市茶私販者家不
疑出與之即擒寘於法子錯初以父廕為大理評事咸
平二年擢進士第直史館累遷至戶部郎中鹽鐵副使

按宋史此下有孔永恭
傳無市蹟足錄今從刪

宋璫字寶臣華州渭南人乾德中進士及第拔萃登科

解褐青城主簿好寫書秩滿數載千卷以歸吳廷祚鎮
永興辟掌書奏廷祚卒復調下邳主簿擢著作佐郎知
綿州太宗即位改右贊善大夫為峽路轉運副使旋知
秦州有善政就拜監察御史充陝西轉運使以韋亶代
知秦州璫去州未百日亶坐事繫獄上以璫前有治績
再命知秦州安集諸戎部內清肅雍熙初轉比部員外
郎在任凡六年召歸授度支判官俄遷屯田郎中知益
州屬歲饑多盜璫始至以方畧擒捕招輯盜遂息下詔

嘉獎端拱初就拜右諫議大夫時兩川轉運使副皆坐
事免以璫為西川轉運使加左諫議大夫改知峽州淳
化中三吳歲饑疾病民多死擇長吏養治之命璫知蘇
州璫體豐碩素病足至州地卑濕疾益甚人或勸其謝
疾北歸璫曰天子以民病俾我綏撫何可以疾辭既而
太白犯南斗曰斗為吳分民方饑天象如此長吏得無
咎乎四年卒年六十一錄其子明遠為蒲城主簿璫性
清簡歷官三十年未嘗問家事唯聚書以貽子孫且曰

使不忘本也明遠淳化三年進士後為都官員外郎次

子柔遠亦舉進士及第垂遠閣門祇候

按宋史此下有
表廊傳無事蹟

凡錄今
從刪

樊知古字仲師其先京兆長安人曾祖偁濮州司戶參
軍祖知諭事吳為金壇令父潛事李景任漢陽石埭二
縣令因家池州知古嘗舉進士不第遂謀北歸過漁釣
采石江上數月乘小舟載絲繩維南岸疾棹抵北岸以
度江之廣狹開寶三年詣闕上書言江南可取狀以求

進用太祖令送學士院試賜本科及第解褐舒州軍事
推官嘗啟於帝言老母親屬數十口在江南恐為李煜
所害願迎至治所即詔煜令遣之煜方聞命即厚給齎
裝護送至境上七年召拜太子右贊善大夫會王師征
江表知古為鄉導下池州八年以知古領州事先是州
民保險為寇知古擊之連拔二砦擒其魁以獻餘皆潰
散方議南征命高品石全振往湖南造黃黑龍船以大
艦載巨竹絙自荆南而下議者以謂江濤險壯恐不能

就乃於石碑口試造之移至采石三日橋成不差尺寸
從知古之請也金陵平擢拜侍御史令乘傳按行江南
諸州詢訪民事復命知江東南路轉運事數日改授江
南轉運使先是江南諸州官市茶十分之八復征其餘
分然後給符聽其所往商人苦之知古請蠲其稅仍差
增所市之直以便於民又奏罷江南舊用鐵錢先是李
煜用兵權宜調斂知古悉奏為常額豫章洪氏嘗掌昇
州權酤逋鐵錢數百萬至是知古挾微時常辱於洪氏

責償銅錢以快意太宗即位授庫部員外郎召為京西
北路轉運使太平興國六年出領荆湖轉運使雍熙初
遷比部郎中會河朔用兵分諸郡為兩路以給漕輓遷
知古為東路轉運使端拱初遷右諫議大夫河北東西
路轉運使兩路各置轉運副使都轉運使之名自知古

始

按長編載太平興國四年十一月己亥以河北轉運使高繼申為河北南路都轉運使下注云按樊知古

傳云都轉運使之名自知古始事在端拱元年十月據實錄則高繼申於太平興國四年十二月己為之必有一誤姑存以俟細考會要云太平興國初分河北南路雍熙中又分為東西路後併焉分為南路或自此始當

俟檢詳據此在李燾作
長編時已自存疑也

二年詔加河北西路招置營田

使奏請修城木五百餘萬牛革三百萬帝謂所請過當
詔有司量以官物給之會度支使李惟清上言河北軍
儲無備請發河南十七軍州粟轉以赴太宗曰農事方
殷豈可更興此役惟清固以為請遣左正言馮拯乘傳
與知古計之知古即言河北軍儲可以均濟足俟農隙
令民轉餉拯復命太宗曰不細籌之則民果受弊矣未
幾入朝奏事稱旨拜給事中為戶部使知古有才力累

任轉運使甚得時譽及在戶部以職事不治詔書切責名益減素與陳恕親善恕時參知政事太宗言及計司事有乖違者恕具以告後因奏事知古遂自解帝問從何得知曰陳恕告臣帝怒恕泄禁中語且嫉知古輕佻故兩罷之出知古知梓州未至改西川轉運使知古自以嘗任三司使一旦掌漕運劍外鬱鬱不得志嘗稱足疾未嘗按行郡縣蜀中富饒羅紈錦綺等物甲天下言事者競商權功利又土狹民稠耕種不足給繇是兼并

者益糴賤販貴以規利淳化中青城縣民王小波聚衆
為亂謂其衆曰吾疾貧富不均今為汝輩均之附者益
衆遂攻陷青城縣掠彭山殺其令齊元振巡檢使張玘
與鬪于江源縣射小波中其額旋病創死玘亦被殺衆
遂推小波妻弟李順為帥所至陷州郡時已詔知梓州
右諫議大夫張雍代知古為轉運使雍未至知古與知
府郭載及屬官走東川詔復令掌兩川漕運知古自劾
擅離所部制置無狀帝特宥之以本官出知均州視事

旬日憂悴卒年五十二賜其子漢公同學究出身知古
明俊有吏幹辭辨捷給及在西川不能弭盜而逃雖獲
宥終以慙死云

郭載字咸熙開封浚儀人父暉右監門衛將軍義州刺
史載蔭為右班殿直累遷供奉官閤門祇候雍熙初拱
舉西州兵馬捕盜事端拱二年擢引進副使知天雄軍
入同勾當三班出知秦州兼沿邊都巡檢使先是巡邊
者多領兵騎以威戎人所至頗煩苦之載悉減去戎人

感悅遷西上閣門使改知成都府載在天雄軍屢奏市
糴朝臣段獻可馮侃等所市麤惡軍人皆曰此物安可
充食太宗頗疑使覆驗之及報與載奏同獻可等皆坐
削官仍令填償及載受代獻可等所市皆支畢復有羨
數三司判勾馮拯以聞太宗召度支司魏羽詰之羽曰
獻可等所市不至麤惡亦無欠數臣與侃親舊是以未
敢白太宗曰此公事爾何用畏避因召宰相謂曰此乃
郭載力奏朕累與卿等議皆云有實今支畢頗有羨餘

軍士復無詞訴郭載朕向以誠純待之何為矯誣及此然已委西川候還日別當詰責於是獻可等悉復官載行至梓州時李順已構亂有日者潛告之曰益州必陷公少留數日可免於禍載怒曰吾受詔領方面阽危之際豈敢遷延耶即日入成都順兵攻城益急不能拒守乃與樊知古奔劍門隨招安使王繼恩統兵討順平之復入成都亦以憂患成病卒年四十載前在蜀頗能為民除害故蜀民悅之再至成都即值兵亂及隨繼恩平

賊亦有所全濟故其死也成都人多數惜之

臧丙字夢壽舊名愚字仲回大名人弱冠好學太平興國初舉進士解褐大理評事通判大寧監官課民煮井為鹽丙職兼總其事先是官給錢市薪吏多侵牟致歲課不充坐械繫者常數十百人丙至召井戶面付以錢既而市薪山積歲有羨鹽致有羨數太宗平晉陽以丙為右贊善大夫知遼州時知石州馮汝士丙同年生也與監軍不協一夕剗刃於腹而死事可疑丙上疏言汝

士死非自殺乞按治帝覽奏驚駭即遣使鞠之召丙問狀丙曰汝士居牧守之任不聞有私罪而言自殺若使冤死不明不加宿直者以罪今後書生不能治邊郡矣帝嘉其直改著作郎累遷右拾遺直史館加工部員外郎朝廷方以九等亞列為重改司農少卿淳化二年拜右諫議大夫出知江陵府歲餘疾卒年五十三以其子待用為四門助教歷賀州刺史次子列進士及第至太

常丞

按宋史此下有徐休復傳無事蹟足錄今從刪

張觀字仲賓常州毗陵人在江南登進士第歸朝為彭
原主簿太平興國初移興元府掾復舉進士不第調雞
澤主簿再求試特授忠武掌書記就改觀察判官上疏
請復刺史及不遣武德卒詣外州偵事頗稱旨召拜監
察御史充桂陽監使獻所業文賜進士及第會三司言
劍外賦稅輕詔觀乘傳按行諸州因令稍增之觀上疏
言增賦以擾遠民非便太宗深以為然因留不遣復上
言臣備位風憲每遇百官起居日分立于庭司察不如

儀者舉之因見陛下多與近臣論政德音往復頗亦煩
勞至於有司職官簿書叢脞咸以上聞殊非國體況帝
王之道言則左史書之動則右史書之列于綱素垂為
規範不可不慎也今遠人未服邊鄙不寧陰陽未序倉
廩猶虛淳樸未還奢風尚熾縣道未治逋逃尚多刑法
未措禁令猶密墜典未復封祀猶闕凡此數者皆朝廷
之急務也誠願陛下下於聽斷之暇延宰執近臣與之揚
推帝嘉之以為度支判官尋遷左司改鹽鐵判官嘗因

奏事言陛下服御器用願從純儉帝曰朕庶事簡約至
於所服多用絕絹皆經澣濯爾卿言甚善觀頓首謝又
諫罷治佛寺不報出為諸路茶鹽制置副使請罷更茶
鹽之制不稱旨改知黃州遷揚州皆有善政會三司改
舊貫均州縣之籍以分其職召為三司河東道判官有
詔計司官屬不得越局言他事觀自以任諫官不奉詔
帝怒謂宰相曰朕俾警三司僚屬各率其職非令諫官
不言時務觀乃妄有援引以諷刺朕姑為容忍不欲深

黃乃令出知道州移廣南西路轉運使坐奏交州黎桓

為亂兵所殺丁璿復位

按宋史本傳作丁璿致宋史外國傳交趾郡王丁璿薨其弟璿

嗣立大將黎桓遷璿於別宮代總其衆據此當作璿今改

事不實被劾獄未具卒於

桂州年五十三觀廣覽漢史雅好論事辭理切直有古

人之風焉

陳從信字思齊亳州永城人心計精敏太宗在晉邸令

典財用王宮事無大小悉委焉累官右知客押衙開寶

三年三司言倉儲月給止及明年二月請分屯諸軍盡

率民船以資江淮漕運太祖大怒責之曰國無九年之蓄曰不足爾不素計而使倉儲垂盡乃請屯兵括民船以運是可卒致乎今設汝安用苟有所闕當罪汝以謝衆三司使楚昭輔懼詣太宗求寬釋使得盡力太宗既許召從信問之對曰從信嘗遊楚泗知糧運之患良以舟人之食日厯郡縣勘給是以凝滯若自發舟計日往復併可支以責其程限又楚泗運米于舟至京復輦入倉宜宿備運卒令即時出納如此每運可減數十日楚

泗至京千里舊八十日一運一歲三運若去淹留之虛日則每歲可增一運今三司欲籍民舟若不計則無以責辦許之則京師冬月薪炭殆絕不若募舟之堅者漕糧其損敗者任載薪炭則公私俱濟且今市米騰貴官價斗錢七十賈者失利不至儲粟之家亦匿而不糶是以米益貴若聽民自便即四方奔湊米多而價自賤矣太宗明日具奏太祖可之其事果集太宗即位遷東上閤門使充樞密都承旨坐事責授閑廐使閤門祇候太

平興國三年改左衛將軍復為樞密都承旨七年坐秦

王廷美事以本官罷

按宋史廷美傳云左衛將軍樞密承旨陳從龍為左衛將軍坐交通

廷美及受其燕犒也所載事與從龍傳同而名作從龍應有一誤

明年分使三部以從

信為度支使加右衛大將軍九年卒年七十三贈太尉

侯莫陳利用者所為多不法始因從信推薦人是以少

之

張平青州臨朐人弱冠寓單州依刺史羅金山金山移

滁州署平馬步都虞侯太宗尹京兆置其邸及秦王廷

美領貴州

按宋史廷美本傳建隆元年授嘉州防禦使二年遷興元尹歷領山南西道永興軍節度

使並無領貴州之文其為貴州防禦使乃廷美子德恭也復署為親吏有訴平匿府

中錢物秦王白太宗鞠之無狀秦王並不喜遂遣去太

宗憐其非罪以屬徐帥高繼沖繼沖署為鎮將平歎曰

吾命雖塞後未必不為福也太宗即位召補右班殿直

監市木秦隴平悉更新制建都務計水陸之費以春秋

二時聯巨筏自渭達河歷砥柱以集於京期歲中良材

山積太宗嘉其功遷供奉官監陽平都木務兼造船場

舊官造船既成以河流湍悍備其漂失凡一舟調三戶
守之歲役戶數千平遂穿池引水繫舟其中不復調民
有寇陽拔華者往來闕輔間為患討之不克平遣人說
之遂來歸改崇儀副使仍領其務凡在陽平九年計省
官錢八十萬緡雍熙初召還同知三班事遷如京使代
王明為鹽鐵使陝西轉運使李安發其舊為陽平姦利
以憂恚成疾卒年六十三贈右千牛衛上將軍平好史
傳微時遇異書盡日耽玩或解衣易之及貴聚書數千

卷平在彭門日郡吏有侮平者數輩後悉被罪配京窻
務平子從式適董其役見之以語平平召至第為設酒
饌勞之給以緡錢且戒從式善視之未幾遇赦得原時
人稱其寬厚從式事太宗藩邸累官文思使次子從吉
以蔭補殿直轉供奉官知宜州屢破溪蠻轉運使堯叟
上其狀累遷內班崇班閤門祇候在任凡八年代還為
如京副使咸平中知環州嘗與宋沆率兵襲西夏小劔
部署張凝表其專責授內殿崇班俄知澧州復舊秩景

德四年宜州軍校陳進叛命副曹利用為廣南東西路
安撫使將兵討之次象州大鳥砦與賊戰進為先鋒郭
志言所刺遂入城以平賊功改莊宅副使未還卒年四
十九

王繼升冀州阜城人性純質謹愿事太宗於藩邸以純
謹被信任及即位補供奉官累遷軍器庫副使陳洪進
來獻漳泉之地以繼升為泉州兵馬都監會游洋洞民
萬餘叛攻泉州繼升潛率精騎二百夜擊破之擒其魁

械送闕下餘黨悉平召還遷軍器庫使領順州刺史知諸道陸路發運事雍熙四年以諸道水陸發運併為一司命繼升與刑部員外郎董儼同掌其事號為稱職俄遷右神武軍將軍端拱初改領本州團練使三月卒年六十四贈洋州觀察使子昭遠

昭遠形質魁偉色黑繼升名之鐵山有膂力善騎射少時入山捕鷹鵠值澗水暴漲十餘丈昭遠升大樹經宿得免嘗涉河冰陷二公傍共援出之昭遠神色自若喜

與里中惡少遊處一日衆祀里神昭遠適至有以博投
授之謂曰汝他日儻有節鉞試擲以卜之昭遠一擲六
齒皆赤南遊京師事太宗於晉邸特被親遇常呼其小
字及即位補殿前指揮使稍遷都知從征太原先登為
流矢所中血漬甲縷戰益急會劉繼元降命守城門籍
兵仗又從征范陽多所擒獲超散員指揮使涪王之遷
房陵也禁衛諸校楊均王榮等以依附被譴獨昭遠無
所預太宗以為忠再遷東四班都虞候太宗嘗草書執

扇作古詩賜諸將意多比諷其賜昭遠尤加賞遇二年

領沙州觀察使

按宋史地理志無沙州惟外國傳有沙州為漢燉煌故地唐時置沙州後沒吐

蕃至宋時世為曹氏所據不應復為殿帥領職蓋宋初殿帥所領使額每沿襲舊名未嘗親鎮其地故不多見於宋史地理志

再為并代副都部署至道中李繼遷擾西鄙絕

靈武糧道命昭遠為靈州路都部署護二十五州芻粟

竟達靈武繼遷不敢犯真宗即位徙定州行營都部署

尋拜保靜軍節度使充天雄軍都部署知府事咸平二

年移知河陽數月卒年五十六贈太尉謚忠和昭遠頗

知書性吝嗇所至無善政母弟昭懿亦事晉邸至捧日
都虞候弟昭遜西京作坊使初祖母郭氏嘗對昭遠母
指昭遠曰此兒有貴相他日必至公侯指昭懿曰此兒
奉錢過二萬不能勝矣果皆如其言昭遠子懷普九歲
事太宗左右至西京左藏庫使平州刺史懷一供備庫
副使懷正內殿承制懷英內殿崇班

尹憲并州晉陽人開寶中事太宗於藩邸太宗即位擢
為殿直充延州保安軍使改供奉官太平興國四年護

府州屯兵與鄜州三族會攻嵐州破敵千餘衆擒偽知嵐州事馬延忠拔緣河諸砦以功轉西京作坊副使入朔州界破寧武軍殺其軍使獲人馬器甲甚衆改護夏州兵轉供備庫使殺戮三汭醜奴莊及誘其渠帥屢降詔書褒美雍熙初詔就知夏州攻破李繼遷之衆于地斤澤繼遷遁走俘獲四百餘帳奏請於所部抽移諸帳別置騎兵號曰平砦以備用詔從之破炭嘉勒羅尼等十四族

按宋史夏國傳載憲知夏州與都巡檢曹光實破李繼遷于地斤澤作太平興國八年事太宗

本紀作雍熙元年與此同至憲破爰嘉勒羅凡十四族
太宗本紀及黨項傳並作雍熙二年本傳載于雍熙初
憲知夏州之前與太宗本紀
黨項傳俱不合今移置于此俄殺蘆關及南山伊埒數

族諸族遂擄代還為洪州巡檢未幾命護莫州屯兵詔
知瀛州兼兵馬鈐轄知滄州移邢州皆兼鈐轄淳化初
與王文寶並命為四方館使連護鎮定州屯兵改知貝
州移高陽關兵馬鈐轄知定州與定州部署王榮不協
榮素粗暴因忿毆憲仆地憲怏怏致疾數日卒年六十

三

王賓許州許田人小心謹愿年十餘事宣祖左右及長
善騎射太宗領兗海節制署府中右職太平興國初補
東頭供奉官亳州監軍遷儀鸞副使從征太原又從征
范陽與彰信節度劉遇攻城東面五年車駕北巡副王
仁贍為大內都部署七年改洛苑使會汴漕壅滯軍食
不給詔別置水陸發運兩司以賓有心計會領濮州刺
史與儒州刺史許昌裔同掌其事凡四年儲積增羨既
為稱職改神武將軍黎陽當舟車交會禁兵常屯萬餘

以度支使張遜薦命護黎陽軍兼領黃御兩河發運事
領本州團練使以賓請黎陽建通利軍命就知軍事賓
規起公署郵館供帳之器咸具加本軍大將軍俄兼河
北水陸路轉運使貝州兵屯無壁壘分寓邸肆賓選隙
地築舍千二百餘以處之優詔褒美召為右羽林軍大
將軍判左金吾兼六軍諸衛儀仗司事淳化四年出知
揚州兼淮南發運使徙為通許鎮都監至道元年卒年
七十三賓事宣祖太祖太宗殆六十年最為勤舊故恩

寵尤異前後賜賚數千萬俱奉釋氏在黎陽日按見古寺基即以奉錢修之掘地丈餘得數石佛及石碣有賓姓名賓異其事以聞詔名寺為淳化

安忠河南洛陽人形質魁岸不知書纔通姓名而已事太宗藩邸殆二十年太宗即位授東頭供奉官弓箭庫作坊等使掌屯兵于雍州會曹彬敗於拒馬河忠分砦兵布列緣邊以備游騎與大將李繼隆田重進崔翰追契丹于祁州北端拱元年移護高陽關屯兵契丹侵鎮

定又與崔翰等拒之傅潛陣于瀛州忠當城之西面徙知壽州移貝州有劇賊十二人久為民患忠悉捕獲淳化四年判左金吾街仗王賓出知揚州以忠代為左龍武軍大將軍忠泣請諸衛將軍列在朝外不得近左右願復舊職帝笑曰環列之官古官也大將軍三品汝終不知朝廷表著之位因從其請俄復東上閤門使充淮南諸州兵馬鈐轄至道三年以病求歸至泗州卒年六十四天禧元年錄其孫惟慶為殿直

欽定續通志卷三百十六

欽定四庫全書

欽定續通志卷三百十七

列傳

宋二十一

張鑑

姚坦

索湘

宋太初

盧之翰

鄭文寶

王子興

劉綜

卞袞

許驥

裴莊

韓國華

慎知禮

張鑑字德明瀛州團練使藏英之孫父裔以蔭補供奉
官鑑本將家幼嗜學大平興國三年擢進士第釋褐大
理評事累遷監察御史奉詔決獄江左頗雪冤滯歷殿
中侍御史會命曹彬等進討幽州問羣臣以方畧鑑上
疏極言不可論者以鑑燕人沮議非忠太宗置不問與
趙延進同掌左藏

按宋史趙延進本傳不載掌左藏事

延進恃恩踰規鑑

廷奏之有旨罷延進以鑑判三司度支憑由催欠司時

三部各置憑由催欠鑑請併為一從之淳化初

按宋史本傳下

文云淳化中盜起西蜀考宋史地理志及通鑑置臨江軍在淳化三年分天下為十道在淳化四年盜起西蜀在淳化五年不應于盜起西蜀事始書淳化年號此處增淳化初方見分明下淳化中從刪

王明李

惟清薦其能用為江南轉運使本部有大姓為民患鑑

以名聞太宗盡令部送魁首及妻子赴闕以三班職名

羈縻之江左震肅又建議割瑞州清江吉州新淦袁州

新喻三縣置臨江軍時以為便召還特被慰獎梓州符

愿驕僭不法命鑑代之遷刑部員外郎再遷改都勾院

擢拜樞密直學士知通進銀臺封駁司掌三班請考校供奉官以下殿最即詔鑑兼磨勘職又言改三司為左右計分天下為十道非便未幾果復舊五年盜起西蜀王繼恩討平之其下恃功暴橫益州張詠密奏請命近臣分屯師旅遣鑑與西京作坊使馮守規偕往面授方略鑑以益部新復軍旅不和聞使命驟至易其戎伍恐或猜懼變生請假臣安撫之名帝稱善鑑至蜀與詠即遣部戍卒出境繼恩麾下使臣亦多遣東還督繼恩等

分路討捕殘寇而自招輯反側事平拜左諫議大夫戶部使會五路進兵討西夏命鑑往環州與李繼隆議護送芻糧入靈州及還疏請以靈州賜繼遷稍息飛輓之役

按長編載鑑此疏在至道三年正月再往陝西督餉之後非靈州還時所上也據疏內有因茲首春俾務

東作云云當在三年正月再往陝西時

尋詔鑑專督軍糧以軍興法從事

饋運頗集真宗即位遷給事中使如故咸平初改工部侍郎出知廣州移知朗州溪洞羣蠻數寇擾鑑召酋豪諭以威信皆俯伏聽命召還以疾徙知相州景德初卒

年五十八子士廉為殿中丞士宗太子洗馬士程屯田
員外郎

姚坦字明白曹州濟陰人開寶中以尚書擢第補將陵
尉歷知潯州太平興國三年召還為著作佐郎通判唐
州八年諸王出閣詔給諫以上於朝班中舉年五十以
上通經有文行者以備宮僚乃以戶部員外郎王適監
察御史趙齊為衛王府諮議左贊善大夫戴元為本府
翊善水部員外郎趙令圖為廣平郡王府諮議國子博

士閭象為本府翊善又以起居舍人楊可法國子博士
楊幼英左贊善大夫杜新及坦為皇子翊善國子博士
邢昺為諸王府侍講太宗召王適等謂曰諸子生長深
宮未知世務必資良士贊導使日聞忠孝之道汝等皆
朕所慎簡各宜勉之坦歷殿中丞倉部員外郎遷本曹
郎中轉考功仍為益王府翊善坦性木強固滯王嘗於
邸中為假山費數百萬既成召賓僚觀之坦獨俛首王
強使視之曰但見血山耳安得假山王驚問故坦曰在

田舍時見州縣催科捕人父子兄弟送縣鞭笞流血被體此假山皆民租稅所為非血山而何時帝亦為假山聞而毀之王少佚豫坦即醜詆帝嘗戒之曰元傑知書好學亦足為賢王矣少不中節亦須婉辭規諷况無大故而詆訐之豈裨贊之道邪頃之左右乃教王詐稱疾不朝太宗日使視疾逾月不瘳甚憂之召王乳母問狀乳母曰王本無疾徒以姚坦檢束居常不得自便王不樂故成疾帝怒曰吾選端士輔王為善王不能用其諫

而又詐疾欲使朕去正人以自便何可得也且王年少必爾輩為之謀耳因命捧至後苑杖之召坦慰諭曰卿居王宮能以正為羣小所疾大為不易卿但如是勿慮讒間朕必不聽王薨改衛尉少卿判吏部南曹他日因事得對上以其舊人召升殿與語坦言及故府意短諸王而稱己之敢言坦退上謂侍臣曰坦在宮邸不能以正理誨諭事有微失即從而揚之此賣直取名耳景德初求補郡俾知鄧州轉運使表其治狀詔嘉獎之大中

祥符初復知光州二年卒年七十五

索湘字巨川滄州鹽山人開寶六年進士釋褐鄆州司

寇參軍

按宋史本傳作釋褐鄆州司理參軍考宋史太祖本紀開寶六年秋七月壬子朔詔諸州府置

司寇參軍以進士明經者為之又長編載開寶六年七月壬子朔詔改馬步院為司寇院以新及第進士九經五經及選人資叙相當者為司寇參軍又文獻通考載開寶六年初置諸州司寇參軍以新進士及選人為之後乃改為司理湘舉進士在開寶六年不應云司理今據本紀及長編通考改

齊州有大獄連

逮者千五百人有司不能決湘受詔推鞠事隨以白太

平興國四年轉運使和峴薦其能遷太僕寺丞充度支

巡官尋拜監察御史九年詔下東封與劉蟠同知泰山路轉運事又為河北轉運副使湘經度供餽以能幹聞事集加屯田員外郎明年契丹入侵王師衄於君子館敵兵乘勝據中渡橋塞土門將趨鎮州諸將計議未定湘為田重進畫謀結大陣東行聲言會高陽關兵敵擁衆邀于平虜城夜率兵而南徑入鎮陽據唐河乘其無備破砦柵敵悉遁走雍熙中召為鹽鐵判官改駕部員外郎端拱二年河北治方田命副樊知古為招置營田

使會議罷復為河北轉運使轉虞部郎中選為將作少監有訟其擅易庫縑以自用者責授膳部員外郎知相州時有羣盜聚西山下謀斷澶州河橋入攻磁相州援旗伐鼓白晝抄劫鄰郡發兵千人捕逐無敢近湘擇州軍得精銳三百人偵其入境即掩擊盡擒之轉運使王嗣宗出狀聞詔復舊官為河東轉運使王超等率師趨烏白池抵無定河水源涸絕軍士渴乏湘亟輦大鋏千枚至令鑿井衆賴以濟真宗即位入為右諫議大夫復

充河北轉運使屬郡民有幹釀歲輸課甚微不逞吏民
因緣為姦盜湘奏廢之德州舊賦民馬以給驛又役民
為步遞湘代以官馬兵卒民皆便之會內殿崇班閻自
新建議請於靜戎威虜兩軍置場鬻茶收其利以資軍
用湘言非便遂止又言事者請許榷場商旅以茶藥等
物販易於北界北界商旅許於雄霸州市易資其懋遷
庶息邊患詔湘詳議以聞乃上言北邊自興置榷場商
旅輻湊制置深得其宜今若許其交相販易則沿邊商

人深入戎界竊為非便又北界商人若至雄霸其中或
雜姦偽何由辨明况邊民易動難安蕃戎之情宜為羈
制望且仍舊會有詔規度復修定州新樂蒲陰兩縣湘
以其地迫窄非屯兵之所遂奏罷之湘少文而長於吏
事歷邊郡所至必廣儲畜為備豫計出入軍旅間頗著
能名先是邊州置權場與蕃夷互市自京輦物貨充之
其中茶茗最為煩擾復道遠多損敗湘請許商賈緣江
載茶詣邊郡入中既免道途之耗復有征算之益又威

虜靜戎軍歲燒緣邊草地以絕南牧或又請於北砦山麓中興置銀冶湘以為召寇亦奏罷之咸平二年入為戶部使受詔詳定三司編敕坐與王扶交相請托擅易版籍責授將作少監三年出知許州徙荆南復為右諫議大夫知廣州四年卒詔遺其子希顏護喪傳置歸鄉里

宋太初字永初澤州晉城人太平興國三年舉進士解褐太理評事通判戎州以善政聞有詔褒美遷將作監

丞贊善大夫通判晉州轉太常丞雍熙三年通判成都府會詔求直言著守成歲以獻淳化初遷監察御史時北面用兵選為雄州通判入判度支勾院為京西轉運副使移河東遷正使改殿中御史至道初遷兵部員外郎充鹽鐵副使時陳恕為使太初有所規畫必咨恕未嘗自用會西鄙有警轉饋艱急充陝西轉運使白守榮等護芻糧抵靈州坐廬之翰違旨責懷團練副使明年起為祠部郎中知梓州俄復舊秩真宗嗣位召還復命

經度陝西餽運事咸平初拜右諫議大夫知江陵府蠻寇擾動太初以便宜制遏詔獎之再知梓州益州雷有

終以母老求還詔太初就代時分川峽為四路

按宋史真宗本

紀咸平四年三月分川峽轉運使為益利梓夔四路本傳作分川陝誤今改

各置轉運使帝

以事有緩急難於均濟命太初為四路都轉運使俾同

規畫與鈴轄楊懷忠不協蜀土始安帝慮其臨事矛盾

召還會御史中丞趙昌言等坐事被劾命權御史中丞

先是按劾有罪必豫請朝旨太初以為失風憲體獄成

然後聞俄出知杭州以浙右卑濕宿疾不便求近地得
廬州疾久頗昏忘不能治太郡連徙汝光二州景德四
年卒年六十二錄其弟繼讓試校書郎太初性周慎所
至有幹職譽嘗著簡譚自為之序子傳慶後為太子中
舍

盧之翰字維周祁州人少篤學家貧客遊單州防禦使
劉乙館於門下乙徙錢塘之翰隨寓其郡太平興國四
年舉進士不得解詣登聞自陳詔聽附京兆府解試明

年登第解褐大理評事知臨安縣三遷殿中丞通判名
州會契丹入侵之翰募城中丁壯決漳御河以固城壁
敵不能攻召還遷太常博士為河東轉運副使徙京西
轉運副使改工部員外郎建議導潁河合於淮達許州
以便漕運加戶部員外郎又改陝西轉運使遷吏部員
外郎至道初李順亂蜀命兼西川安撫轉運使會調發
芻糧輸靈州詔分三道護送命洛苑使白守榮馬紹忠
領其事之翰遵旨擅併為一為李繼遷邀擊於浦洛河

大失輜重詔國子博士王用和乘傳逮捕與轉運使宋太初及副使秘書丞竇玘皆繫獄鞫問坐除名之翰貶許州司馬明年起為工部員外郎同勾當陝西轉運使真宗即位復吏部員外郎充轉運使以久次召拜禮部郎中復遣之任咸平元年以疾命國子博士張志言代還未幾復出為京西轉運使先是朝廷議城故原州以張守備之翰沮罷之其後西鄙不寧修葺為鎮戎軍之翰坐橫議非便黜知歸州三年授廣南西路轉運使會

廣州索湘卒就改太常少卿知州事之翰無廉稱又與轉運使凌策不協陰發其事五年徙知永州未行卒年五十七

鄭文寶字仲賢寧化人

據東都事畧增

右千牛衛大將軍彥華

之子彥華初事李煜文寶以蔭授奉禮郎掌煜子清源公仲寓書籍遷校書郎歸朝煜以環衛奉朝請文寶欲一見慮衛者難之乃被簑荷笠以漁者見陳聖主寬宥之意宜謹節奉上勿為他慮煜忠之後補廣文館生深

為李昉所知太平興國八年登進士第除修武主簿遷
大理評事知梓州錄事參軍事代歸獻所著文召試翰
林改著作佐郎通判潁州丁外艱起知州事召拜殿中
丞使川峽均稅次渝涪聞夔州廣武卒謀亂乃乘舸泛
江一夕數百里以計平之授陝西轉運副使許便宜從
事會歲歉誘豪民出粟三萬斛活饑民八萬六千口既
而李順亂西蜀秦隴賊趙卬聚衆數千將趨劔閣以附
順文寶移書蜀郡分兵討襲獲其渠魁餘黨殲焉文寶

前後自環慶部糧越旱海入靈武者十二次曉達番情
習其語經由部落每宿酋長帳中人或呼為父遷太常
博士召至闕下奏對捷辨帝深眷遇俄加工部員外郎
時龍猛卒戍環慶七年不得代思歸謀亂文寶矯詔以
庫金給將士且自劾請代償詔蠲其所費先是諸羌部
落樹藝殊少但用池鹽與邊民交易穀麥會餽輓趨靈
州為繼遷所鈔文寶建議以為銀夏之北千里不毛但
以販青白鹽為命請禁之許商人販安邑解縣兩池鹽

於陝西以濟民食官獲其利而戎益困繼遷可不戰而
屈乃詔自陝以西有敢私市者皆抵死募告者差定其
罪行之數月犯者益衆戎人乏食相率寇邊內屬萬餘
帳亦叛商人販兩池鹽少利多取他逕出唐鄧襄汝間
邀善價吏不能禁闕隴民無鹽以食境上騷擾帝知其
事遣知制誥錢若水馳傳視之悉除其禁召諸族撫諭
之乃定朝廷議城古威州遣內侍馮從順訪于文寶文
寶言威州在清遠軍西北八十里樂山之西唐大中時

靈武朱叔明收長樂州邠寧張君緒收六關即其地也
故壘未圯水甘土沃有良木薪秭之利約葫蘆臨洮二
河壓明沙蕭關兩戍東控五原北固峽口足以襟帶西
涼咽喉靈武城之便然環州至伯魚伯魚抵青岡青岡
拒清遠皆兩舍而清遠當羣山之口扼塞門之要請先
建伯魚青岡清遠三城為頓師歸重之地古人有言金
城湯池非粟不能守俟二年間秦民息肩臣請建營田
積粟實邊之策修五原故城專三池鹽利以金帛啖党

欽定四庫全書

欽定續通志

卷三百十七

十三

項酋豪子弟使為朝廷用不惟安朔方制豎子至於經
營安西綏復河湟此其漸也詔從其議文寶至賀蘭山
下見唐室營田舊制建議興復可得秔稻萬餘斛減歲
運之費清遠據積石嶺在旱海中去靈環皆三四百里
素無水泉文寶發民負水數百里外留屯數千人又募
民以榆槐雜樹及猫狗鴉鳥至者厚給其直地烏鹵樹
皆立枯西民甚苦其役而城之不能守卒為山水所壞
又令寧慶州為水磴亦為山水漂去繼遷酋長威喇卜

威斯鄂者文寶以金帛誘之與手書要約留其長子為質令陰圖繼遷即遣去謂之曰事成朝廷授汝以刺史文寶又預漆木為函以備馳獻繼遷之首又發民曳古碑石詣清遠軍將圖紀功威喇卜等盡以事告繼遷繼遷上表請罪帝怒文寶猶含容之既而文寶復請禁鹽邊民冒法抵罪者甚衆太常博士席義叟決獄陝西廉知其事以語中丞李昌齡以聞文寶又奏減解州鹽價未滿歲虧課二十萬貫復為三司所發乃命鹽鐵副使

欽定四庫全書

欽定續通志

卷三百十七

十四

宋太初為都轉運使代文寶還下御史臺鞠問具伏下
詔切責貶藍山令未幾移枝江令真宗即位徙京山咸
平中召還授殿中丞掌京南榷貨時慶州發兵護芻糧
詣靈州文寶素知山川險易上言必為繼遷所敗未幾
果如其奏轉運使陳緯沒於賊繼遷進陷清遠軍命相
府召文寶詢策畧文寶因獻河西隴右圖叙其地利本
末且言靈州可棄時方遣大將王超援靈武即復文寶
工部員外郎為隨軍轉運使至環州或言靈州已陷文

寶乃易服引單騎冒大雪間道抵清遠故城盡得其實
遂奏班師就除本路轉運使上疏請再葺清遠軍都部
署王漢忠言其好生事遂徙河東轉運使嘗上言管內
廣銳兵萬餘難得資糧請徙置近南諸州又欲令強壯
戶市馬備征役宰相李沆等以為廣銳州兵皆本州守
城置營必慮安土重遷徙之即致紛擾又強壯散處鄉
落無所拘轄勒其市馬亦恐非便帝復令文寶條對文
寶固執前議且言土人久留恐或生事帝曰前令團併

軍伍改置營壁欲其互移本貫行之已久而文寶確陳其利因命錢若水詳度以聞若水所對與沆等同遂罷之先是麟府屯重兵皆河東輸餽雖地里甚邇而限河津之阻土人利於河東民罕至則芻粟增價帝嘗訪使邊者言河裁闊數十步乃詔文寶於府州定羌軍經度置浮橋人以爲便會繼遷圍麟州令乘傳晨夜赴之圍解遷刑部員外郎頃之寇準薦其熟西事可備驅策因復任陝西轉運使嘗出手劄密戒令邊事與僚屬計議

勿得過有須索重擾於下後有言其張皇者詔徙京西以朱台符代之景德元年契丹侵邊又徙河東文寶安輯所部募鄉兵張邊備又領蕃漢兵赴河北手詔褒諭未幾復涖京西契丹請和文寶陳經久之策帝嘉之三年召還未至遇疾表求藩郡散秩詔聽不除其籍續奉養疾以其子鄆州推官於陵為大理寺丞知襄城縣以便其養大中祥符初改兵部員外郎車駕祠汾陰還文寶至鄭州請見帝以其久疾除忠武軍行軍司馬文寶

不就以前官歸襄城別墅六年卒年六十一文寶能為詩善篆書工鼓琴好談方畧以功名為已任久在西邊參預兵計心有餘而識不足又不護細行所延薦屬吏至多而未嘗擇也

王子興字希孟密州莒人少業文辭太平興國八年舉進士解褐北海主簿歷大理評事知臨海縣改光祿寺丞使西蜀決獄還知興國軍淳化中雷有終為江浙荆湖茶鹽制置使奏于興為判官轉太子中允改著作郎

江淮兩浙制置茶鹽就轉太常博士真宗即位遷殿中
侍御史因入對與三司論列利害以子輿為長轉度支
員外郎子輿以每事上計司移報稽滯求兼省職乃命
為鹽鐵判官仍領制置增歲課五十餘萬貫咸平三年
就命兼充淮南轉運使子輿精於吏事久掌茶鹽漕運
周知利害裁量經制公私便之所至郡縣以公事申請
者文牒紛委頃刻待報子輿皆即決遣曾無凝滯明年
表求代詔許自擇子輿以卞袞劉師道名聞即命袞與

師道為轉運使召子興拜右諫議大夫戶部使五年方
奏事便殿俄疾作仆地命中使掖之以出至第卒子道
宗方幼命三司判官朱台符檢校其家子興止一子而三
女皆幼道宗尋卒家寓楚州子興妻劉還父母家子興
旅櫬在京師景德中官借船移柩還葬其里鬻京師居
第以錢寄楚州官庫備三女資送從其從弟之請也

劉綜字居正河中虞鄉人少依外兄通遠軍使董遵誨
遵誨嘗遣貢馬太祖嘉其敏辨將授三班之職綜自陳

素習詞業願應科舉及還帝解真珠盤龍衣以賜遵誨
綜辭曰遵誨人臣安敢當此賜帝曰吾委遵誨以方面
不以此為疑也雍正二年舉進士第解褐邛州軍事推
官就改永康軍判官遷大理評事通判蒼州轉太僕寺
丞代還對便殿因言蜀地富庶安寧已久益州長吏望
慎擇其人帝嘉之改太子中允未幾李順果為亂復召
見尋為三門發運司水陸轉運使通判大名府連丁家
難起知建安軍先是天長軍及揚州六合縣民輸賦非

便綜奏請降天長軍為縣隸揚州以六合縣隸建安軍

自是民力均濟

按宋史地理志載天長軍廢為縣隸揚州以揚州之六合縣隸建安軍並在至

道二年本傳作至道二年以前事與志互異

至道二年遷太常丞咸平初命

代王欽若判三司都理欠憑由司出為河北轉運副使

上言州縣募職官以昏耄放罷者其間有實廉謹之士

或幼累無託或居止無定全藉祿廩以濟朝夕一旦停

罷則饑寒無依以傷和氣望自今並除致仕官又言法

官斷獄皆引律令之文以定輕重之罪及其奏御復云

慮未得中別取進止殊非一成不變之道且復煩於聖
斷望自今降旨約束不得復然時河北承兵寇之後民
戶凋弊吏部所銓幕職州縣官皆四方之人不習風俗
且有懷土之思以是政事多因循不舉綜請自今並以
河朔人充之冀其安土以勤職事夏人擾邊環慶大屯
士馬詔徙綜為陝西轉運副使時梁鼎議禁解鹽官自
貨鬻乃命綜與杜承睿制置青白鹽事綜條上利害力
言非便卒罷其事時靈州孤危獻言者或請棄之綜言

靈州民淳土沃為西陲巨屏所宜固守以為扞蔽然後
於蒲洛河建軍城屯兵積糧為之應援此暫勞永佚之
勢况鎮戎軍與靈州相接今若棄之則原渭等州益須
設備較其勞費恐十倍滋多也俄充轉運使又獻議於
鎮戎軍置屯田務又錄唐安國鎮制置城壕鎮戎古記
石本以進詔從其請又言天下州郡長吏審官皆據資
例而授未為得人自今西川荆湖江浙福建廣南知州
或地居津要或戶口繁庶之處望親加選任其執政舊

臣及給舍以上知州處亦擇官通判又京朝官當任遠
官者率以父母未葬為辭意求規免請自今父母委未
葬者許請告營辦審官投狀並明言父母已葬方許依
例考課違者並罷其官從之六年再為河北轉運使時
兩河用兵邊事煩急轉漕之任尤所倚辦綜繼領其職
號為詳練景德三年召拜戶部員外郎樞密直學士勾
當三班院綜言御史員數至少每奉朝請劾制獄多以
他官承之甚紊曩制望詔兩制以上各舉才堪御史者

充三院共置十員若出使按獄所經州郡官吏能否生
民利病刑獄枉濫悉得察舉四年西幸道出河陽境上
時節度王顯被疾還京以綜權知孟州事未幾召還復
出知并州大中祥符四年館伴契丹使因作大雪歌以
獻即命同知貢舉以李宗諤代為館伴使俄權知開封
府綜以貴要交結富民為之請求或託為親屬奏授試
秩緣此謁見官司頗紊公政請加抑止又文武官居遠
任而家屬寓京師其子孫弟姪無賴者望嚴行約束并

其交游輩劾罪從之七年以老疾求典河中真宗以太
寧宮廟長吏奉祠綜艱於拜起慮不克恭事命知廬州
明年罷學士授右諫議大夫八年卒年六十一綜強敏
有吏材所至抑挫豪右振舉文法時稱幹治然尚氣好
勝不為物論所許子建中正中並贊善大夫弟綽淳化
三年進士官刑部郎中

卞袞字垂象益州成都人父震舉蜀進士渝州刺史南光
海辟為判官蜀平仍舊職會賊杜承褒率衆圍城援兵不

至震躬率士卒且戰且拒為流矢所中創甚不能臨軍而州兵重傷卷甲宵遁刺史陳文襲又不能遏賊遂入據郡城以偽官厚賄誘震震皆斬其使賊有東章者本州兵校也因遣人述朝廷威德諭以禍福章懼且信因伏兵擊其黨類承襲之衆素不為備即時大潰震與文襲分部餘卒夾攻之賊衆遂平文襲坐陷失州城削籍為民震以前功得贖以虢州錄事參軍卒太平興國八年袞登進士第累遷大理評事知將樂縣改光祿寺丞

通判泗州再通判宣州淳化中上命采庶僚中廉幹者
給御書印紙俾書課最仍賜實奉以旌異之袞預焉改
太常丞咸平初遷監察御史為淮南轉運副使同荆湖
發運使以幹職聞就加殿中侍御史入判三司開拆司
再為淮南轉運使兼發運使六年併三司使之職分置
副貳以袞為刑部員外郎充鹽鐵副使景德初卒年四
十五錄其弟辰為臨潁主簿子咸為將作監主簿袞明
敏有吏幹累掌財賦清心治局號為稱職然性慘毒培

克嚴峻專事挫楚至有大蟲之號真宗嘗謂近臣曰衮
公忠盡瘁無所畏避人罕能及然頃在外任頗傷殘酷
所至州縣纖微之過無所容貸大凡督察部下糾逖愆
違非有大故所宜矜恕官吏自當畏威懷恩不敢貳過
公家之事亦無不濟乃知為吏之方適中為善也

許驥字允升世家薊州祖信父唐世以財雄邊郡唐知
契丹將擾邊白其父當遷去信以資產富殖不樂他徙
唐潛齎百金而南未幾晉祖以燕薊賂契丹唐歸路遂

絕嘗擁商貲於汴洛間見進士綴行而出竊歎曰生子當令如此因不復行商卜居睢陽娶李氏女生驤風骨秀異唐曰成吾志矣郡人戚同文以經術聚徒唐攜驤詣之且曰唐頃者不辭父母死有餘恨今拜先生即吾父矣又自念不學思教子以興宗緒此子雖幼願先生成之驤十三能屬文善詞賦唐不識字而罄家產為驤交當時秀彥太平興國初詣貢部與呂蒙正齊名太宗尹京頗知之及廷試擢甲科解褐將作監丞通判益州

累遷右補闕歷江南轉運副使洪吉上供運船水損物
主吏懼罪故覆舟鞠獄者按以欺盜當流死者數百人
驥馳往訊問得其情實以聞多獲輕典優詔褒之又上
言劫盜配流遇赦得原還本鄉讎告捕者多所殺害自
今請以隸軍詔可遷正使端拱初拜主客郎中徙知福
州累表求還不俟報入朝召對便殿延問良久以久處
外任為辭擢授右諫議大夫就命知益州召歸上言蜀
民浮窳易搖宜擇忠厚者撫之為預備既而李順叛衆

頗服其先見命知審官院遷御史中丞以疾固讓不許
中謝日命坐勞問出良藥賜之真宗即位改兵部侍郎
屢求小郡養疾因入朝失儀為御史所糾特詔不問命
出知單州咸平二年卒年五十七贈工部尚書賜其子
宗壽出身驥雖無他才畧而人以儒厚長者稱之宗壽
後為殿中丞

裴莊字端已閬州閬中人在蜀以明經登第歸朝歷虹
縣尉高陵主簿本府召權司理掾轉運使雷德驤以威

望自任嘗巡按至境官屬皆出迎候莊獨視事本局徐
謁道周德驤稱其守徙權忻州錄事參軍先是并州侍
積軍儲條制甚峻掌出納者嘗十餘人莊代之獨任其
事擢授絳州防禦推官提點并嵐二州緡帛芻糧改遼
州判官仍蒞舊局雍熙三年命將巡邊以莊掌隨軍糧
料內客省使楊守一稱薦之授大理寺丞時遷雲朔降
戶於汝洛遣莊安輯之俄通判忻州未上道會魏咸信
出鎮澶州以通判澶州改命未踰年咸信表其能遷太

子中允端拱初潘美鎮真定又辟為通判時契丹掠趙
深邊將無功莊上書以為周世宗誅樊愛能何徽二將
遂取淮南克巴蜀願陛下申明紀律無使諸將玩寇又
言緣邊若柵戍兵既寡敵易襲取咸請廢罷以益州兵
會詔建方田莊復上言大役兵師慮生事於邊鄙帝善
之淳化三年召訪以邊事稱旨令授清資官翊日拜監
察御史荆湖南路轉運使未行改三司鹽鐵判官五年
李順亂蜀命與雷有終並兼陝路隨軍轉運同兵馬事

或言莊本蜀人不宜任此帝益信之許以便宜事平轉
殿中侍御史歷工部司封二員外郎至道二年遣將五
路出師討李繼遷莊陰料師出無功因請加恩繼遷俟
其倔強拒命則按甲塞外俘擒未晚既而諸將果敗績
咸平二年巡撫江南使還言池州興國軍得良吏餘無
足稱且言朝廷所命知州通判率以資考而授至有因
循偷安無政術而得親民之任其素蘊才器有政績者
偶緣公坐則黜司冗務真偽莫辨僥倖倖倖滋甚請自今慎

選其人勿以資格補授有政績者加以恩禮是年秋契丹侵邊命為河北轉運使時傅潛統大軍駐定州北莊屢奏其無謀畧慮或失機會王顯掌樞密顯與潛俱起攀附頗庇之莊奏至多不報徙知越州俄傅潛得罪莊因上言顯潛皆非材致誤邊事請行嚴誅以肅羣議未幾徙知宣州會詔求直言莊條列四事一去暴征二省煩刑三擇吏職四敦稼政疏奏詔令開陳其所宜行先後莊對甚悉改司封郎中景德初安撫兩浙奏能吏二

十人慢官者五人多所升黜又知潞邢二州天禧二年
改光祿卿告歸卒年八十一錄其孫慶孫試將作監主
簿莊有吏幹頗無清操慷慨敢言然寡學術嘗建議請
置廣聽院西垣學士聞者嗤之于真咸平二年進士屯
田郎中稷左班殿直閤門祗候按宋史此下有牛冕張
適樂崇吉袁逢吉四傳
俱無事蹟足
錄並從刪

韓國華字光弼相州安陽人太平興國二年舉進士解
褐大理評事通判瀘州就遷右贊善大夫代還除彰德

軍節度判官遷著作佐郎監察御史雍熙中假太常少卿使高麗時太宗將北征以高麗接遼境屢為其所侵命齎詔諭之且令發兵西會既至其俗頗獷驚恃險遷延未即奉詔國華移檄諭以朝廷威德宜亟守臣節否則天兵東下無以逃責於是俯伏聽命使還歷遷左司諫充鹽鐵判官淳化二年契丹請和朝議疑其非實遣國華使河朔察之既至盡得其詐以聞每歲後苑賞花三館學士皆得預三年國華與潘太初因對自言任兩

省清官兼職計司不得侍曲晏願兼館職即日命並直
昭文館後二日陪預苑晏三司屬官兼直館自國華等
始知河陽潞州轉運使言其善綏輯詔獎之景德中假
秘書監使契丹又為江南巡撫入權開封府判官真宗
朝陵魏咸信自曹州召入扈從命國華權州事俄改太
常少卿出知泉州大中祥符初遷右諫議大夫四年代
還至建州卒于傳舍年五十五贈太師中書令兼尚書
令追封魏國公

按宋神宗御製韓琦兩朝願命定策元
勲之碑載曾祖璆廣晉府永濟縣令祖

構太子中允父國華諫議大夫皆贈太師中書令兼尚書令追封齊燕魏三國公宋史國華傳不載贈封今據

補

賜其子琬出身國華偉儀觀性純直有時譽子琚璩

琦並進士及第琦相英宗神宗自有傳

按宋史此下有
何蒙傳無事蹟

足錄今
從刪

慎知禮衢州信安人父溫其有詞學仕錢俶終元帥府

判官知禮幼好學年十八獻書于俶署校書郎未幾命

為掌書記太祖即位介俶子惟濟入覲歸署營田副使

太平興國三年從俶歸朝授鴻臚卿歷知陳州興元府

知禮母年八十餘居宛邱懇求歸養退處十年縉紳稱其孝至道三年以工部侍郎致仕知禮自幼至白首歲讀五經周而後止每開卷必正衣冠危坐未嘗少懈焉咸平初卒年七十七子從吉錢俶之壻也為元帥府長史歸朝歷將作少監會擇朝士有望者補少列改太子右庶子真宗升儲換衛尉少卿真宗即位復為右庶子遷詹事從吉自歸朝居散秩幾三十年頗以文酒自娛士大夫多與之游景德初上言求領事務判刑部頗留

意法律大中祥符初改授衛尉卿糾察在京刑獄拜右
諫議大夫判吏部銓臨事敏速勤心公家所至務皦察
多請對陳事帝嘉其無隱八年改給事中權知開封府
有咸平縣民張斌妻盧氏與姪質交訟從吉子鈞銳納
盧氏賄從吉坐削秩法當死特杖脊黥坐首露在已發
當天禧三年起為衛尉卿明年判登聞鼓院坐與寇準
善以光祿卿致仕未幾卒年七十具分遺權要晚年進
子鏞金部度支員外郎祕閣校理楷太常博士

欽定續通志卷三百十七